



Centar za zastupanje  
građanskih interesa

Sarajevo, 06.02.2012.

## OTVORENO PISMO

Poštovani,

Obraćamo vam se u vezi neusvajanja Zakona o budžetu institucija Bosne i Hercegovine i međunarodnih obaveza za 2011. i 2012 godinu, kao i zabrinjavajućeg načina vođenja dosadašnjeg budžetskog procesa.

Fondacija Centar za zastupanje građanskih interesa (CPI) smatra da su Vijeće ministara BiH, zajedno sa gosp. Nikolom Špirićem, koji je u to vrijeme obavljao funkciju predsjedavajućeg Vijeća ministara BiH, i ministrom finansija i trezora g. Draganom Vrankićem, najodgovorniji za propuštanje svih predviđenih rokova i sveopšti nered koji je doveo do blokade finansiranja institucija i međunarodnih obaveza Bosne i Hercegovine.

Podsjećamo vas da, prema odredbama članova IV.4., V.3., i VIII.1. Ustava BiH, Parlamentarna skupština BiH svake godine, a na osnovu prijedloga Predsjedništva BiH pripremljenog uz preporuku Vijeća ministara BiH, usvaja budžet kojim se finansiraju institucije i međunarodne obaveze Bosne i Hercegovine. Također, rok za usvajanje budžeta za 2011. godinu je bio 31. decembra. 2010 godine, a rok za usvajanje budžeta za 2012 godinu je istekao 31. decembra 2011. godine.

Gosp. Nikola Špirić, tadašnji predsjedavajući Vijeća ministara BiH, je 31. decembra 2011. donio *Odluku o privremenom financiranju institucija BiH i međunarodnih obaveza* za razdoblje januar - mart 2012. u visini jedne četvrtine sredstava usvojenog budžeta za 2011. godinu. Vijeće ministara BiH, a naročito Ministarstvo finansija, su morali znati da je, bez prethodnog donošenja Zakona o izvršenju budžeta institucija BiH i finansiranja međunarodnih obaveza BiH za 2011., nemoguće pronaći zakonski osnov za utvrđivanje tačnog iznosa jedne četvrtine sredstava budžeta iz 2011, a samim tim je nemoguće sprovesti i *Odluku o privremenom financiranju institucija BiH i međunarodnih obaveza* za razdoblje januar - mart 2012.

Gosp. Nikola Špirić je *Odluku o privremenom financiranju institucija BiH i međunarodnih obaveza* za razdoblje januar - mart 2012 trebao donijeti u tačnom iznosu, na isti način na koji je donio i *Odluku o privremenom financiranju institucija BiH i međunarodnih obaveza* za razdoblje januar - mart 2011, kada je tačan iznos za finansiranje institucija BiH iznosio 257 miliona KM, a za servisiranje međunarodnih obaveza BiH 85,5 miliona KM.

Korištenjem termina jedna četvrtina, budžetski proces u Bosni i Hercegovini je sveden na nivo špekulacije, koji je doveo i do naknadne političke trgovine, neefikasnosti i neviđene neodgovornosti prema građanima Bosne i Hercegovine.





Centar za zastupanje  
građanskih interesa

Iako je Vijeće ministara najodgovornije za finansijski haos u kojem se nalazi BiH, Fondacija CPI smatra da i Predsjedništvo BiH, i oba doma Parlamentarne skupštine BiH također nose svoj dio odgovornosti, a ponajprije zbog odsustva adekvatne reakcije, kao i krajnje nesavjesnog ponašanja u budžetskom procesu.

Dostavljeno:

- Predsjedavajućem i članovima Predsjedništva BiH
- Kolegiju Predstavničkog Doma Parlamentarne skupštine BiH
- Kolegiju Doma naroda Parlamentarne skupštine BiH
- Predsjedavajućem Vijeća ministara BiH
- Ministru i zamjenika ministra finansija BiH

Cc:

- Šef Delegacije i specijalni predstavnik Europske unije u BiH
- Visoki Predstavnik u BiH
- Svim medijima

CPI je nevladina, neprofitna organizacija koja prikupljanjem, analizom i objavljivanjem podataka od interesa za građane, te njihovom promocijom, aktivno podržava izgradnju civilnog društva. Fondacija CPI nastoji omogućiti da javni i verificirani podaci važni za građane BiH budu lako dostupni u kontekstu i na način kojeg može razumjeti građanin koji se profesionalno ne bavi javnom administracijom i javnim finansijama.

